



## საქართველოს გარემოს დაცვისა და სოფლის მეურნეობის მინისტრი

### ბრძანება N 2-238

23/03/2022

ქ. თბილისი

#### ქ. ბათუმში, მეჯინისწყლის დასახლებაში, მიწისქვეშა მტკნარი წყლის (წელიწადში 30 000 000 მ<sup>3</sup>) სამეწარმეო მიზნით მოპოვებაზე სკრინინგის გადაწყვეტილების შესახებ

აჭარის ავტონომიური რესპუბლიკის ფინანსთა და ეკონომიკის სამინისტროს მიერ, გზმ-ის ჩატარების საჭიროების დადგენის მიზნით, საქართველოს გარემოს დაცვისა და სოფლის მეურნეობის სამინისტროში წარმოდგენილია ქ. ბათუმში, მეჯინისწყლის დასახლებაში, მიწისქვეშა მტკნარი წყლის (წელიწადში 30 000 000 მ<sup>3</sup>) სამეწარმეო მიზნით მოპოვების სკრინინგის განცხადება.

სკრინინგის განცხადების მიხედვით, სალიცენზიო ობიექტი, რომელიც წარმოდგენილია 22 ჭაბურღილით, მდებარეობს ქ. ბათუმში, მეჯინისწყლის დასახლებაში, ე. ხაბაძის ქ. №16-ში, შპს „ბათუმის წყლის“ საკუთრებაში არსებულ მიწის ნაკვეთზე (ს/კ: 05.32.06.140). წიაღითსარგებლობის ობიექტის GPS კოორდინატებია: №1 ჭაბურღილი - X - 718584, Y - 4608776; №2 ჭაბურღილი - X - 718616, Y-4608824; №3 ჭაბურღილი - X-718669, Y-4608774; №4 ჭაბურღილი - X-718706, Y-4608731; №5 ჭაბურღილი - X-718667, Y-4608673; №6 ჭაბურღილი - X-718641, Y-4608739; №7 ჭაბურღილი - X-718599, Y-4608719; №8 ჭაბურღილი - X-718610, Y-4608691; №9 ჭაბურღილი - X-718560, Y-4608615; №10 ჭაბურღილი - X-718561, Y-4608653; №11 ჭაბურღილი - X-718531, Y-4608584; №12 ჭაბურღილი - X-718501, Y-4608509; №13 ჭაბურღილი - X-718667, Y-4608568; №14 - ჭაბურღილი X-718627, Y-4608583; №15 ჭაბურღილი - X-718618, Y-4608494; №16 ჭაბურღილი - X-718578, Y-4608440; №17 ჭაბურღილი - X-718553, Y-4608359; №18 ჭაბურღილი - X-718542, Y-4608293; №19 ჭაბურღილი - X-718432, Y-4608287; №20 ჭაბურღილი - X-718417, Y-4608224; №21 ჭაბურღილი - X-718566, Y-4608575; №22 ჭაბურღილი - X-718534, Y-4608543. მონაცემთა ელექტრონული გადამოწმების შედეგად დგინდება, რომ სალიცენზიო ობიექტიდან (№1 ჭაბურღილი) მანძილი უახლოეს საცხოვრებელ სახლამდე შეადგენს 30 მეტრს. უახლოესი ზედაპირული წყლის ობიექტი, მდ. ჭოროხი, მიედინება საპროექტო ტერიტორიიდან (№20 ჭაბურღილი) 648 მეტრში.

წარმოდგენილი დოკუმენტაციის თანახმად, ჰიდროგეოლოგიური დარაიონების თვალსაზრისით, წიაღითსარგებლობის ობიექტის ტერიტორია მიეკუთვნება აჭარათრიალეთის ნაოჭა ზონის წყალწნვეიან სისტემას, რომელიც მოიცავს აჭარა-იმერეთის ნაპრაღური წყლების წყალწნვეიან სისტემას. წყალშემცველი ჰორიზონტი ლითოლოგიურად წარმოდგენილია ლოდნარ-კენჭნარებით და ქვიშიან-კენჭნარიანი ნალექებით, სადაც შემავსებელია ქვიშები, თიხნარიანი ქვიშები, თიხნარები და თიხები. ჰორიზონტის კვება ხდება ატმოსფერული ნალექებითა და მდინარეების წყლებით.

საინჟინრო-გეოლოგიური პირობების სირთულის მიხედვით, სალიცენზიო ობიექტის ტერიტორია მიეკუთვნება I (მარტივი) კატეგორიას. წიაღითსარგებლობის ობიექტის გეოდინამიკური სიტუაცია სტაბილურია და ექსპლუატაციის ეტაპზე გართულებები

მოსალოდნელი არ არის. სკრინინგის განცხადების მიხედვით, ჭაბურღილების სიღრმე უცნობია. სალიცენზიო ობიექტზე მოწყობილია ჭაბურღილების თავმორთულობები და მრიცხველები, მოპოვებული მიწისქვეშა მტკნარი წყლის რაოდენობის აღსარიცხად. სალიცენზიო ობიექტიდან მოპოვებული წყალი იკრიბება ტერიტორიაზე მოწყობილ წყალშემკრებ აუზში.

სკრინინგის განცხადების შესაბამისად, პროექტის ფარგლებში, არსებული ჭაბურღილებიდან დაგეგმილია წელიწადში 30 000 000 მ<sup>3</sup> მტკნარი წყლის სამეწარმეო მიზნით მოპოვება, ხოლო ლიცენზიის გაცემის ვადად განსაზღვრულია 5 წელი, შესაბამისად, ლიცენზიის ფარგლებში მოსაპოვებელი მიწისქვეშა მტკნარი წყლის საერთო მოცულობა შეადგენს 150 000 000 მ<sup>3</sup>-ს.

წარმოდგენილი დოკუმენტაციის თანახმად, ქიმიური შედგენილობით წყლები ძირითადად ჰიდროკარბონატული კალციუმიან-ნატრიუმიანი, იშვიათად ნატრიუმ-კალციუმიანი ტიპისაა. მიწისქვეშა წყლების ტემპერატურა 13- 14<sup>0</sup>C-ის ფარგლებში მერყეობს.

სკრინინგის განცხადების მიხედვით, ქ. ბათუმის წყალშემკრები და მისი მიმდებარე ტერიტორიები შესწავლილია დეტალური საძიებო სამუშაოების სტადიაზე. წარმოდგენილი ინფორმაციის შესაბამისად, სალიცენზიო ჭაბურღილების ზუსტი დებეტი უცნობია, თუმცა, ჰორიზონტის წყალშემცველობის ხარისხის გათვალისწინებით, 22 ჭაბურღილიდან 5 წლის განმავლობაში 150 000 000 მ<sup>3</sup> მიწისქვეშა მტკნარი წყლის მოპოვება შესაძლებელია. საექსპლუატაციო მარაგი დამტკიცებული არ არის და იგი წარმოდგენილია P<sub>2</sub> (პროგნოზული) კატეგორიით.

წარმოდგენილი დოკუმენტაციის თანახმად, სალიცენზიო ობიექტი არ მდებარეობს სახელმწიფო ტყის, დაცული ტერიტორიების და კულტურული მემკვიდრეობის ძეგლების სიახლოვეს. ამასთან, ვინაიდან წიაღისეულის ობიექტი უკვე მოწყობილია და თითოეულ ჭაბურღილს გააჩნია თავმორთულობა, საქმიანობის განხორციელება დაკავშირებული არ იქნება რაიმე სახის სამშენებლო სამუშაოების განხორციელებასთან და ახალი ტერიტორიების ათვისებასთან, რაც გამოიწვევდა გარემოს სხვადასხვა კომპონენტებზე ზემოქმედებას. შესაბამისად, დაგეგმილი პროექტის ფარგლებში, მოსალოდნელი არ არის ნარჩენების წარმოქმნა და ნიადაგის ნაყოფიერ ფენაზე ზემოქმედება. ამასთანავე, საქმიანობის სპეციფიკის გათვალისწინებით, პროექტის განხორციელება არ იქნება დაკავშირებული ატმოსფერული ჰაერის ხარისხზე და ხმაურის გავრცელებით მოსალოდნელ ზემოქმედებასთან.

საქმიანობის სპეციფიკის გათვალისწინებით, ბუნებრივი რესურსებიდან გამოყენებული იქნება წყალი. წიაღით (წყლით) სარგებლობის სალიცენზიო პირობების განხორციელებით, დაგეგმილი საქმიანობა არ გამოიწვევს წყლის გარემოს დაბინძურებას.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება გამოქვეყნდა სამინისტროს ოფიციალურ ვებგვერდზე და ქ. ბათუმის მუნიციპალიტეტის მერიის საინფორმაციო დაფაზე. ადმინისტრაციული წარმოების ეტაპზე, საზოგადოების მხრიდან, აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

**ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსის“ მე-7 მუხლის მე-6 ნაწილისა და ამავე კოდექსის მე-II დანართის მე-2 პუნქტის 2.2 ქვეპუნქტის საფუძველზე,**

**ვ ბ რ ძ ა ნ ე ბ:**

1. მიღებულ იქნეს სკრინინგის გადაწყვეტილება, რომ ქ. ბათუმში, მეჯინისწყლის დასახლებაში, მიწისქვეშა მტკნარი წყლის (წელიწადში 30 000 000 მ<sup>3</sup>) სამეწარმეო მიზნით მოპოვება არ დაექვემდებაროს გარემოზე ზემოქმედების შეფასებას;
2. ლიცენზიის მფლობელი ვალდებულია „გარემოსდაცვითი შეფასების კოდექსის“ მე-7 მუხლის მე-8 ნაწილის შესაბამისად, უზრუნველყოს გარემოსდაცვითი ტექნიკური რეგლამენტებით დადგენილი მოთხოვნებისა და გარემოსდაცვითი ნორმების დაცვა;
3. ბრძანება დაუყოვნებლივ გაეგზავნოს აჭარის ავტონომიური რესპუბლიკის ფინანსთა და ეკონომიკის სამინისტროს;
4. ბრძანება ძალაში შევიდეს აჭარის ავტონომიური რესპუბლიკის ფინანსთა და ეკონომიკის სამინისტროს მიერ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში გადაწყვეტილება განთავსდეს სამინისტროს ოფიციალურ ვებგვერდზე და ქ. ბათუმის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. №6) მხარის მიერ მისი ოფიციალური წესით გაცნობის დღიდან ერთი თვის ვადაში.

ოთარ შამუგია



მინისტრი